



## Yeye Anaelewa Nia Zetu

**A**kawaita wanafunzi wake, akawaambia, Amin, nawaambia, Huyu mjane maskini ametia zaidi kuliko wote wanaotia katika sanduku la hazina. — Marko 12:43.

Yesu alikuwa katika ukumbi ambapo kulikuwa na masanduku ya hazina, na alitazama wale waliokuja kuweka sadaka zao. Wengi wa matajiri walileta kiasi kikubwa cha fedha, ambacho walikileta kwa kujivuna sana. Yesu aliwaangalia kwa huzuni, lakini hakusema chochote kuhusu matoleo yao ya hiari. Mara ile, uso Wake uling'aa alipoona mjane maskini akikaribia kwa kusitasita, kana kwamba alikuwa na wasiwasi wa kuonwa. Wakati matajiri na wenye majivuno walipokuwa wakipita kwa haraka ili kuweka michango yao, yeye alirudi nyuma kana kwamba alihisi aibu ya kuendelea mbele. Hata hivyo, alitamani kufanya kitu fulani, ingawa kilikuwa kidogo, kwa ajili ya huduma aliyoipenda.

Aliangalia sadaka iliyokuwa mkononi mwake. Ilikuwa ndogo sana ikilinganishwa na sadaka za wale walio karibu naye, lakini hiyo ndiyo yote aliyokuwa nayo. Akisubiri nafasi yake, alikurupuka kwa haraka kutupa senti zake mbili, na akageuka ili aondoke upesi. Lakini akiwa katika kufanya hili, alivutia jicho la Yesu lililokuwa likimtaazama kwa umakini.

Mwokozi aliwaita wanafunzi Wake na kuwataka waelewe umaskini wa mjane huyo. Kisha maneno Yake ya sifa yakafikia sikio lake: "Amin, nawaambia, Huyu mjane maskini ametia zaidi kuliko wote" Machozi ya furaha yalijaza macho yake alipoona kwamba tendo lake liliieleweka na kuthaminiwa. Wengi wangeweza kumshauri aweke sehemu yake kwa matumizi yake mwenyewe; ikiwa ingepelekwa kwa makuhani waliojaa shibe, ingetoweka katikati ya sadaka nyingi za thamani kubwa zilizowekwa kwenye hazina. Lakini Yesu alielewa nia yake. Aliamini kwamba huduma ya Hekalu ilikuwa ya mpango wa Mungu, na alikuwa na shauku ya kufanya yote aliyoweza kuiunga mkono. Aliweza kufanya alichoweza, na ikawa tendo lake litakuwa ukumbusho wa kumbukumbu yake kwa muda wote, na furaha yake katika umilele. Moyo wake ulienda pamoja na sadaka yake; thamani yake ilipimwa, si kwa thamani ya sarafu, bali kwa upendo kwa Mungu na shauku ya kazi Yake iliyochochea tendo hilo.

Ni nia ambayo inaonesha tabia kwa vitendo vyetu, ikiweka alama ya fedheha au ya maadili ya hali ya juu. Si vitu vikubwa ambavyo kila jicho linaona na kila ulimi unapenda ambavyo Mungu anaviona kuwa vya thamani zaidi. Majukumu madogo yanayofanywa kwa furaha, matoleo madogo ambayo hayaoneshi, na ambayo kwa macho ya kibinadamu yanaweza kuonekana kuwa hayana thamani, mara nyingi hutambuliwa zaidi machoni pake. Moyo wa imani na upendo ni wa thamani zaidi kwa Mungu kuliko zawadi ghali zaidi.... Ilikuwa ni roho hii isiyo na ubinafsi na imani iliyo kama ya mtoto iliyopata pongezi za Mwokozi.

Miongoni mwa maskini kuna wengi wanaotamani kuonesha shukrani zao kwa Mungu kwa neema na kweli Yake. Hebu waache waweke senti zao kwenye benki ya mbinguni. Ikiwa itatolewa kutoka kwenye moyo uliojaa upendo kwa Mungu, vitu hivi vinavyoonekana kuwa vidogo vinakuwa zawadi zilizowekwa wakfu, michango yenye thamani isiyopimika inayomfanya Mungu atabasamu na kubariki (The Desire of Ages, 614, 615).